

**Date – 07/01/2025**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Chief Minister Pu Lalduhoma kaihhruiin CM Conference Hall-ah Mizoram High Power Committee on PMJVK thukhawmin hmasawna hnathawh tur hrang hrang an sawiho.**
- 2. Transport Minister Pu Vanlalhlana Union Minister for Ports, Shipping and Waterways (MoPSW) Pu Sarbananda Sonowal kawmin, Inland Water Transport atana hma a lak mekte a sawipui.**
- 3. President Draupadi Murmu-i chuan Chhatishgarh-a District Reserve Guard te beihna chu a dem thu a sawi**
- 4. Union Health Minister JP Nadda chuan Human Metapneumovirus chu hri thar anih loh thu leh chiaina tur a awmlo a ti.**

<><><>

**PMJVK**

**Chief Minister Pu Lalduhoma kaihhruiin CM Conference Hall-ah Mizoram High Power Committee on PMJVK nimina thukhawmin hmasawna hnathawh tur hrang hrang an sawiho.**

**Meeting-ah hian Mizoram sawrkarin PMJVK hmanga hmalakna tur projects a lo thehluh tawh central sawrkarin ennawn leh deuh tul nia a ngaihte ennawna neih a ni. January thla chawhma lama chin fel hman ni se, an ti a ni.**

**Meetingah hian Minister Pi Lalrinpuii, Dr. Vanlalhlana, Prof. Lalnilawma, Pu F. Rodingiana leh Adviser to CM Pu TBC Lalvenchhunga bakah Chief Secretary Pu Khilli Ram Meena leh Planning Department hotute te an tel a ni.**

<><><>

**TRANSPORT MINISTER**

**Transport Minister Pu Vanlalhlana chuan Union Minister for Ports, Shipping and Waterways (MoPSW) Pu Sarbananda Sonowal chu a chenna inah kawmin, Transport Department-in Inland Water Transport (IWT) atana hma a lak mekte chu chak lehzuala thawh a nih theih nan hmalakpui turin a ngen.**

Transport Department hnuai ah hian IWT project pathum kalpui mek a ni a. Development of IWT on River Khawthlangtuipui-River Tuichawng, Development of IWT on River Tlawng (National Waterway-102) leh Development of IWT River Chhimtuipui te kalpui mek a ni. Heng project-ah te hian techno-economic feasibility neih zawh tawh niin a then DPR siam zawh tawh a ni a, la siam zawh loh te pawh peihfel thuai beisei a ni bawk. Heng bakah hian Transport Minister hian Tuirial Dam chu IWT project atan chauh ni lo a zin mi te hip thei tur a tourism atan a hmuhma tha tak awmna a ni tih sawiin ruahmanna hlawhtling tak kalpui a nih theih nana zirchianna, feasibility study kalpui a pawimawh thu a sawipui bawk a ni.

Minister hi Transport Director Pu R Lalrammawia'n a tawiawm a ni.

<><><>

LUNGLEI

Lunglei District SP Pu J.Lalmuankima chuan hunpui vuakveta Lunglei district chhunga Police ten an duty theuh te tha taka an hlen chhuah avang leh harsatna lian tham thleng lo-a hunpui an hmang thei chu lawmawm a tih thu a sawi.

He thu hi nimina SP Conference Hall, Lunglei a Lunglei Police te'n kumthar inhlan tharna hun leh hunpui vuak veta police duty dan te thlir letna hun an hmannaah sawii SP Pu J Lalmuankima chuan thahnemngai taka duty te Lunglei Police te chungah lawmthu a sawi a, hunpui ralmuang taka hman a nih theih nana veng hrang hranga tlawmngaia duty YMA leh VDP te chungah lawmthu a sawi a ni .

He hunah vek hian Inhlantharna neih zawh anih hnuah hunpui vuakveta duty dan thlir let a ni a. Police duty te atangin an duty dan hrang hrang te ngaihthlak a ni. Pu HC Muanzova chuan hunserh hmangin Lunglei Police ten Pathian hruaina an chan avanga Pathian hnena lawmthu sawina leh inhlan hun a hmang bawk a ni.

<><><>

SPEAKER

Mizoram Legislative Assembly Deputy Speaker Pu Lalfamkima chuan National Highway 306 & 06 siam hna thawh mek chu tha tak a siam a pawimawh thu leh chak taka kalpui a tul thu a sawi a.

Nimina Kolasib DC Conference Hall a thutkhawmnaah Pu Lalfamkima chuan Thal laia kawngpui siam zawh a nih theih nan theihtawp chhuah turin Contractor-te leh NHIDCL hotu chu a ngen thu a sawi a. National Highway siam hna an thawh kawngah harsatna an neihte Mizoram Sawrkar hnenah a rang lam thlen zel turin Deputy Speaker chuan a chah bawk.

He hunah hian Kolasib Deputy Commissioner, Pu Robert. C. Lalhmangaiha chuan an thutkhawm chhan sawifiahin National Highway 306 & 06 siam chungchangah vawi tam tak thutkhawm a lo ni tawh thu leh tun Working Session chhunga kawngpui siam hna chu zawh hman a nih loh chuan Mizoram mipuite'n NHIDCL leh an hnuai Contractor te, PWD (National Highway) te chu an dem hle dawn a ni a ti a.

He thuthkhawmah hian NHIDCL leh Contractor te atangin an hmalak tawhna leh hna an kalpui tum zel dan tur ngaihthlakna neih a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

CYMA OFFICE

Central YMA President Pu Lalhmachhuana chuan Mizo hnam hrang hrang te Inpui Central YMA Office chu Mizo fate tan nghet takin a ding zel ang a ti.

He thu hi nimina Central YMA Office Tuikhuahtlang Pisa hawnnah sawiin Pu Lalhmachhuana chuan kum 2025 chu Mizoram leh a pawna awm zawmg zawng Zofate tan malsawmna, vanneihna leh ralmuanna kum lo ni se a ti a.

He hun hi Central YMA Asst Secretary Pu Fabian Lalfakawma chuan a kaihruai a, Vice President Prof Lalnuntluanga'n tawngtaina in hun a khar a ni.

<><><>

CHHATISGARH

President Draupadi Murmu-i chuan Chhatisgarh-a District Reserve Guard te beihna chu a dem thu a sawi a. Ramchunga Naxal-te nuai chimit turin sawrkarin theihtawp a chhuah mek a ni a ti bawk.

Nimin chawhnu lama Chhatisgarh-a Maoist ten tualchher bomb hmanga sipaite an beihnaah hian security mi leh sa mi pariat an thi a. Thudawn danin vanduaina thlenna hmun hi Bijapur district ah niin Security force te hi an camp-a an let leh lam lirtheia an tlan laiin bomb hi a tihpuak a ni.

Kan Corr report i lo ngaithla ang u.

Union Home Minister Amit Shah pawhin nimina sipaite beih an ni chu a dem thu a sawi a. An thihna chu a thlawn dawn lo tih a tiam a. Kum 2026 March thla hmain Naxal te chu nuai bo vek an ni ang a ti bawk.

<><><>

UNION HEALTH MINISTER

Union Health Minister JP Nadda chuan Human Metapneumovirus chu hri thar anih loh thu leh chiaina tur a awmlo a ti. China-a leng mek HMPV hi Karnataka-ah mi pahnihin an kai tih hmuhchhuah a ni tawh a. Union Health Minister chuan HMPV chu kum 2021 ah khan hmuhchhuah tawh anih thu sawiin khawvel pumah kum engemawzat chu a darh tawh a tia . Boruaka hri

leng anih vangin kum bithliah awmlovin mitin kai theih a ni a ti a. Sawrkar chuan uluk taka a vil reng thu leh ramchhungah an inralrin reng thu a sawi a ni.



### HMPV

China rama natna chi khat, HMPV an tih mai, Human Meta-pneumovirus hluar chho mek karah Karnataka-ah HMPV vei mi 2 hmuhchhuah a ni. Health & Family Welfare Ministry sawi danin, hri kaite hi ram pawna la zin ngailo ve ve, naute, hmeichhia thla 3 mi leh mipa thla 9 mi an ni a, that lam an pan chho zel a ni.

HMPV hi khawvel India tiamin ram hrang hrangah a darh mek tih Health Ministry chuan a sawi a, ram thenkhatah chuan HMPV kai, thawk lama harsatna neite pawh an awm thu dawn a ni. Indian Council of Medical of Medical Research (ICMR) leh Integrated Disease Surveillance Prog. chuan thil awm dan vil rengin tun dinhmunah hritlang khawsik lam natna emaw thawk lam tibuai thei natna emaw a hluar thar lova, hri leng hluar chho hmachhawn turin ruahmanna engkim peihfel a ni tih Union Health Ministry chuan a sawi bawk.



### PAKISTAN

India chuan Pakistan sipai thlawhnaten Afghan civil mi tam tak an kaphlum chu a dem thu a sawi. External Affairs Ministry thupuangtu Randhir Jaiswal chuan tunhnaia chanchinthara Afghan civil mi hmeichhia leh naupang tiamin Pakistan sipaiten an kaphlum chu a dem thu a sawi a. India chuan pawisawi lo tihlum chu a dem tih sawiin hetiang a thenawm ramte beih hi Pakistan chet fo dan a nih thu a sawi a ni.

